



琴士詩鈔

卷五

涇縣趙紹祖著


孫同璋曾孫

蛟起

同校

建安古瓦歌為叔月巖作

阿瞞亦是人中夫。手把漢鼎傾而扶。果然老奸不  
 世出。幾人稱寡。幾人孤。紹術繡布掃卷籜。用兵不  
 肯讓。孫吳短歌慷慨壓七子。橫槊雄才一世無。高  
 臺巍巍聳當塗。臺上置酒下飛弧。當時盛氣茂權  
 備。江左何足當。一呼二喬不鎖東。風惡西陵墓草  
 旋吹枯。不然文王豈西伯。肯待子丕知。唐虞分香



賣履冷歌吹。燒萁煮豆窮根株。而况同槽得三馬。  
 瞥然一樣畫葫蘆。盛衰如此奚足論。古硯突兀悲  
 吾徒。月巖先生奮健筆。草書神速能盤紆。追思先  
 澤不敢用環石齋頭當座隅。環石齋先伯當年落  
 筆點凹凸。萬鈞轉手輕髯蘇。雲揮電掃得百紙。何  
 異赤壁焚舳艫。物精年久不易測。恐有怪鬼追亡  
 逋。自今什襲更藏裏。寶之不啻青珊瑚。江秋史曰  
絕似元遺

山學杜  
之作

題仇十洲天女散花圖

吳剛大斧斫月桂。廣寒花開三千歲。摘花何自到

仙都。帝傍玉女罷投壺。罷投壺。下閭闔。輓轡推車  
 風颯颯。霓旌飄忽會羣仙。就中玉女顏如蓮。手把  
 天花散雲端。天花亂墮如雲煙。雲渺渺。煙漫漫。人  
 間能得幾枝看。盛春谷曰寄託  
深婉言外可思

古劍篇

落葉颯颯蛩亂鳴。雄談夜半聞雞聲。有客拔劍出  
 示我。意態慷慨氣縱橫。自言貯之紫匣中。常聞龍  
 虎吟吼。同有時取出一起舞。錯鏤精光鷲鶻融。去  
 如北風吹白雪。來如天際垂長虹。明如秋月耀寒  
 魄。矯如蒼虬盤碧空。意其出自顓頊氏。號稱書影

有神功。干將莫邪。皆不及。霜花閃閃。逼人急。迎風  
一嘯。天地愁。夜半四照。鬼神泣。曾斬兩蛟。中流渡  
一擊。袁公飛上樹。腐儒得此。亦何爲。琴書落拓。隨  
行路。我有一言。君莫忤。劍乎。劍乎。光未吐。冲天寶  
氣不可知。恐有神雷來捕取。

入山題壁

千山引客行。行上鳥雀嶺。嶺名四顧杳無人。恍惚在  
仙境。一折再轉。嶺不窮。聳身直至白雲中。風颼颼  
兮。萬壑動。虹下飲兮。澗之東。仄徑乍斷兮。古木參  
差。霜未降兮。葉半紅。下臨萬丈不測之深潭。上有

千尋難躋之奇峰。飛鳥不敢到。猿聲切切。生淒風。  
偶然數武別一天。山勢讓路峰纏連。山頭倒景入  
寒泉。石鏡皎潔。山西偏草芊芊兮。如帶溪渺渺兮。  
生煙驟咨嗟而歎絕。忽自顧而生憐。惜才人之未  
到。致斯地之不傳。半空人語落危巒。樵夫荷擔下  
層巔。問之不答。自語言芭蕉。反照在吾前。芭蕉嶺名越  
關旗兮。趨九里。關旗九里皆嶺名丁溪。地名茅屋結嶺底。明  
月兮飛來。余將寄宿兮。溪之裏。盛春谷曰規樞青蓮幾于神似  
我欲

我欲獻賦。壓屈賈。朝朝曳裾。侯門下。揮毫三峽如

倒流下筆千言可倚馬青萍不得薛公門懷中半  
刺滅無文馮君無魚空彈鋏蘇子裘敝難搖唇出  
門茫茫向何處昂藏七尺誰同羣

鄰有俗子計且拙勸我爲商遂所欲篋中有金不  
患貧陶朱富致萬鍾粟千金珠萬金玉藏珠剖其  
臂獻玉刖其足害與利相隨榮必翻爲辱長揖大  
笑謝之去燕雀安能知鴻鵠

前有張騫後班超飛而食肉真人豪曷不千金買  
駿馬百金買寶刀將刀耀馬隴西路挾策從軍滹  
沱渡飲馬無定河飛羽黃雲戍單于避旌旗大宛

皆內附陰山萬里絕羣醜衛霍妬功掣其肘君不  
見李廣數奇不封侯魏尙尙老雲中守

又將賣馬買黃犢歸來躬耕南山曲農家亦有四  
時樂煖衣飽食世無辱朝耕暮耨不知疲大田掘  
出古墓碑碑中姓名生不識死後詎知君是誰棄  
鋤對碑三太息蕪穢不治寧嗚饑天生七尺必有  
用如此悠悠將安爲

叔肖巖曰中間一轉  
筆力奇橫出人意

蓬萊道士何翩翩見人便說學神仙蕊珠宮瑤池  
泉仙子居在白雲邊崑崙天闕相鈎連中有不死  
藥食之忘歲年我欲隨之往中心自流連君不見

漢武空築仙人臺。方士神異何有哉。但見童男卅女入海去。不聞不死藥。從海邊來。章犀臺曰盤鬱畢兕一氣鼓鑄

如一篇

### 送友

相餞出城西。攀折長亭柳。別意不可言。飲此一杯酒。廣陵潮送木蘭舟。黃河五月如清秋。試聽鷓鴣無遠近。關山明月好回頭。兄頽存曰語淺情深宛然唐音

### 回舟至采石拜太白祠登樓放歌

翠螺一山如湧出。橫枕長江而突兀。上有謫仙嘯傲之高樓。亭亭挺拔在林樾。扁舟一葉過山來。欲

到山巔。勤拜謁。舟人期日至金陵。風利帆張不肯歇。遙望山形何鬱葱。樹木森森摩蒼穹。丹陽巨鎮信不誣。天然秀氣蟠江東。有如削出青芙蓉。有如亘作白玉虹。直如生花五彩筆。俯如攫水雙飛龍。須臾港絕江復通。山勢讓舟風轉蓬。瞥然回首在山背。奇景更與前不同。纍然伏者如虎豹。欲起搏人如羆熊。三元洞口流險隘。飄渺江心若倒掛。浮却蜃樓海市來。應須爭勝雲天外。挂席一瞬挾雲飛。眼前忽失真世界。蓬瀛咫尺不得卽。數月于今未能釋。竭來下拜謫仙祠。踴躍登樓慰所思。舉目

茫茫萬頃裏不見山巔見江底陽烏浴罷天未沉  
洪波早湧冰輪起琉璃一片無點塵瓊洲瑤島清  
如此微風鼓鑄萬壑吼水晶宮底開靈藪竈笛鼉  
鼓鳴鳴鳴馮夷起舞龍蛇走軍聲十萬夜潮來洞  
庭湘君趨左右想見然犀照渚時光燭百怪逼羣  
醜神工鬼斧狀不來大造元氣落誰手敢云筆下  
搖五嶽未見胸中羅八斗屠龍之技今已無繡虎  
雕蟲我何有高呼太白騎鯨還便借長江作美酒  
吁嗟乎茲山茲水真殊尤人生何地著閒愁臨風  
塊礪俱消盡誰歟千古為同謀平明散髮扁舟去

到家典盡千金裘

兄頽存曰洋洋大篇中分三層寫景回環起伏恍惚迷離極才

人之能事

### 登鼇峰

宣州環山如游龍北自敬亭南繞東陂陀蜿蜒勢  
不住鼇峰別峙西南中危城一帶聳百雉後枕高  
山前面水宛句二溪合作流陵陽三峰疊相倚帆  
檣點點望中開千里在眼無纖埃長松怪栢不遮  
目但有濤聲颯颯吹向耳邊來曠然滌我塵襟俗  
落日返照空篁竹雲中鴉影搖碎金水面風紋皺  
細綠此時獨立心茫然蒼蒼萬古來無端瞿然顧

影空自憐。謝公不作謫仙死。誰攜佳句一一問青  
天。峰頭徙倚向來路。徘徊欲去仍留步。炊煙四起  
薄城闔。暝色催人不得住。浩歌一曲賦將歸。已看  
微露沾人衣。行行取徑陽坡道。明月彎彎挂樹杪。

敬亭山謁七賢祠

宣州城北蟠龍東。敬亭合沓入雲中。竭來訪古循  
山麓。七賢祠屋藏深竹。七賢前後非一時。宦寓飄  
蓬任所之。風雨已剝當時碣。梁棟重新舊日祠。憶  
昔元暉刺此地。民淳紛務皆屏棄。蓬萊文章繼建  
安。清音厯落如仙吹。驚人好句壓謫仙。欲向青天  
問其義。謫仙謗傷多虬蜉。光燄傾倒韓潮州。騎鯨  
捉月來宛句。新詩點破敬亭秋。韓公早年曾暫駐  
至今別業尚如故。共說昌黎讀書處。臨川七歲能  
屬文。工麗清新思不羣。一麾出作宣州刺。終能致  
主乘風雲。小范老子更卓卓。常先天下之憂樂。家  
居遂入晏公幕。應天設帳懸木鐸。江南知學自此  
作。土人舊有五賢堂。後復增入張與姜。山陽十疏  
不見報。歸途匝地兵戈譟。憤然退走昭亭間。布袍  
芒鞋還獨弔。如農謫向宣城戍。甲申國變未及赴  
死必葬我敬亭麓。一坏土掩貞毅墓。嗚呼世事何



足數變態升沉隨煙霧滄海桑田未有常石泐金  
磨詎如故科斗空傳半段碑句溪已改當年渡古  
祠猶自傍山巔山風夜月神留連溪毛蒞藻陳几  
筵燕語鶯歌奏管絃年年寒食遊人集挈榼提壺  
問七賢盛春谷日用合傳之法成詩委蛇詳盡

題赤壁圖

炎精黯淡光欲熄老瞞長江飛戰艦周郎雄才天  
下無猶借餘火燒赤壁火烈風猛天為紅舳艫千  
里沈江東一洗江山之塵障惟留明月與清風網  
魚載酒眉山公耳得目遇與客同英雄一去霸業

空却有詩人傳餘蹤畫工畫游不畫戰為愛清景  
長無窮平生湖海氣未脫對此慷慨來填胸因思  
當日周公瑾不數黃州禿髮翁叔肖巖曰賓主秩然一結更有英爽  
致之

追和雲起五叔秋夜吟簡張端甫原韻

端甫有答

詩兄章平亦有和作

朔風捲霜霜天高擁被苦吟揮月毫韓孟元白誇  
對壘忍使古今勝事盡以屬爾曹叔氏健筆發清  
響鸞鳴碧梧鶴鳴臯張君龍文扛萬斛寶劍不匣  
玉不韜寄詩何所似倒吸海底千丈濤答詩何所

擬雷風戰鬪魚龍逃奇師雄陣幻出沒各建金鼓  
立幟旄洞庭鄱陽兩空濶沿江上下飛萬艘爭驅  
並驚信勁敵有客鼎足來相鑿又如海上三山可  
望不可到但聞天籟鳴嘈嘈我欲乘槎往覓渡奈  
何弱水不浮毛卽今詩品日頽下却看風會流滔  
滔樂府變作南北曲閨位紫色秋蛙號拍板顧曲  
何癡絕羣居并作一談牢時同人多好填詞及作小令故云少陵  
不作昌黎死誰振木鐸宣雷鼗得如諸君法往古  
余胡爲者心憂勞一吟一快一擊節轟然酣飲頽  
酩醕章犀臺曰奇氣逼人

獨坐

獨坐停雲之小館雕紅錯繡之闌干百尺蟠龍之  
桂樹千竿垂鳳之瑯玕鄭草鄴架久盤桓魯陽揮  
戈不可駐年華流逐歲云寒彭殤齊壽信妄言陶  
公惜陰意亦酸

珠簾繡幕圍瑤閣文窗椒戶羅瓊爵絳樹一笑展  
清喉碧玉春纖來勸酌簫聲引鳳皇舞袖迴雲鶴  
食進麻姑盤丹進安期藥意氣自謂能千秋誰知  
轉瞬成蕭索昔時臺榭今塵埃古人已矣我心哀  
悲風從北來吹我芭蕉枯葉開人生能幾時坐使

志氣成灰頽高歌將進酒青絲白髮交相催躅躑  
中庭不能說月明霜冷空徘徊

拔劍斫平地石迸火飛如散星丈夫東西南北客

安能坐守一柴荆青雲期得路天梯擬共登仙人

不招手白眼常見憎高吟行路難所恨羽翼不能

生此兄穎存曰清超跌宕逸致翩躚鮑明遠乃有勝場章犀臺曰其源亦自古樂府來

烏江謁項王廟

函關氣盡祖龍死揭竿稱兵天下起英雄不學劍  
與書大志雄謀從此始彼可取代語何豪項梁膽  
落心驚搖當時目已無秦皇顧盼何知有漢高豈

知氣短姬馬逝悲歌垓下風蕭蕭此非戰罪遭天

滅豎子成名真鼠竊悔不鴻門遂一決空使亞父

提玉玦恨須咬斷蛇矛鐵江流百丈怒潮來猶帶

君王舊時血客子停舟瞻廟首到來酌地一杯酒

陰雲四野蒼天低威靈彷彿來左右慷慨君猶百

戰身落拓吾當杜默後平明鼓棹向金陵悵然愁

望大江口章犀臺曰蒼勁是作家本色

贈陳碎琴

嶧陽之桐高十尋斲而繫之朱絲繩譜以山水有  
清音伯牙膠手鍾期死廣陵散絕大雅沉先生交

游多巨人豈其未得一知心胡爲先生號碎琴

送別王經大

白門風雨生客愁裹足不下秦淮樓潘公開筵使  
招飲座中美客皆吾儔惟子賢豪更超越與吾相  
見便相悅萍踪一揖如故交傾情倒意不忍別名  
山勝境偕往回雞鳴埭上同傾杯後湖荷香忽到  
鼻釣艇風動蘆花開高歌不盡登臨興落日更上  
雨花臺蕭梁富貴更塵土蒼茫鵠立使心哀金陵  
才子汪炳文倒屣來迎意欣欣試探囊中錢買此  
席上樽細斟淺酌不稱意大觥連舉舞蹲蹲雄談

竒辨助快飲如鉅野受黃河奔灑酒長江弔古今  
當筵意氣無等倫此時歡樂真云好雨散星離殊  
草草余欲歸家便買舟君猶留滯長千道爾來十  
月嚴霜時天寒苦凍牽夢思一朝命駕不辭遠竭  
來訪我話襟期我家大阮喜君至爲理芒屨踏西  
水竹木蕭疎隱兩楓

水西園名

煙雨空濛落三寺三寺

門前水飲虹塔勢突兀撐青空王君好奇膽如斗  
聳身絕頂疑天通大觀石刻三十六一一環讀聲

隨風

水西崇寧塔上有大觀碑刻雖載志乘而莫能詳王君周環讀之得三十六方

自是

君身有仙骨世人那得躡其蹤翩然行意不可阻

琴言金 卷五  
拏舟直去無回顧玉塵乍揮湖岸雲布帆欲掛邗  
江雨秦淮橋畔送余歸賞溪渡口又分飛何堪互  
唱驪駒曲使我別淚沾裳衣

魯星村曰猶夷  
駘宕神似太白

古梅行

族某所移植也某卒  
一夕大雷雨樹遂萎

阿誰栽爾幾許時兩幹天矯盤蒼枝移來蔬香亭  
畔植妙意幽香襲不得鈎盤屈曲如雙龍攫雲拏  
空何挺特上有鵲鴿巢下有鼈鼈集空村夜半萬  
壑靜但聞四山霎霎風聲急又聞獨鶴啼子規哭  
疑是山川鬼神入主人洒掃琅玕圃日夕披襟坐  
其側春來翠羽啾嘈鳴獨插繁花不對客忽驚一

夜雷破山小龍披靡老蛟泣敗鱗亂落何飄忽蜿  
蜒不比當時質尾血淋漓飛不出墮入黃泉蛻其  
骨古來神物信有是精意與人相終始昔聞竹爲  
寇公生今見梅爲主人死

宣州市上觀戲法詩以紀之

一人一盤竿一束雙手弄盤如轉轂撒手忽地盤  
上騰隨取一竿拄盤足一手持竿竿娉婷一手拍  
盤盤輾轉竿不在手或以肩或以足承或以腹引  
竿向左盤右欹竿軟時作荷葉曲聳盤離竿盤下  
旋換竿接盤竿上矗竿如筆直盤正中一竿一竿

次第續竿竿相銜出屋高竿人仰面靜注目有時  
 故作險態竒竿勢彎彎盤勢覆竿直竿彎盤不知  
 盤正盤欹竿自屬忽地放竿竿四分竿聲仆地如  
 裂竹盤似風旋墜半空雙手執盤如執玉是時觀  
 者如堵墻目眩色戰舌欲縮竿盤調在心手調古  
 今萬事妙在熟洪北江太史曰寫生妙手兄穎  
 存曰筆端了了如目中了了非  
 文通生花筆那得有此神技

題吳山濤畫冊

國初以來畫山水妙手獨推婁東王千邱萬壑任  
 開闔細皴淺暈入微茫吳生野逸亦可喜兩三大  
 樹山蒼蒼讀畫亦各適人意南宗北派何雌黃

雪後過五溪望九華山有作

東風吹雪雪未融凍雲片片巖前封千山萬山馬  
 頭過瞥然捧出九朶銀芙蓉老蛟攫雲向霄漢巨  
 靈斧劈撐穹窿不知拔地幾千尺渾渾一氣通洪  
 濛眼前竒景說不出但覺曠盪來心胸謫仙仙去  
 仙才絕前度劉郎今未逢才人無命似僧好金沙  
 金地開琳宮後來遊人何寂寞空使山鬼嗤雕蟲  
 安能搖此怪峰變作如椽筆一掃萬古如發矇洗  
 出此山真面目烟波江山青重重

兄穎存曰起勢  
 突兀警卓結更

矯變異常至才人無命二語偶然遊  
戲却從無人道及讀之令人解頤

雪中訪魯星村

星村名瑣懷寧人家盛唐山山下自號盛唐山人

布衾一夜冷如鐵侵曉冒寒即命轍盛唐山下訪

畸人盛唐山頭見積雪主人邀客便置酒酒酣不

覺耳生熱興來高詠樅陽歌四座無言凍雲裂漢

武當年親射蛟箭激潮頭浪有血雄風一代古所

無彈指千年過飄瞥天柱灑山望裏高溢浦潯陽

水空咽滄江一粟渺何如祇抱詩篇自怡說有酒

莫辭玉山頽放歌不惜唾壺缺門外北風雪已深

我醉欲還當小別

盛春谷曰即景生情脫胎東坡前赤壁而筆力雄渾亦足相匹

清渠閣觀桂

入門古香滿一宅團欒老桂高百尺主人喜桂新

着花邀客桂下同布席午時置酒日漸西露華欲

濕月上壁拇戰觴飛不肯辭不知今夕是何夕長

安看桂多貴人一枝比並崑山璧詎堪攀樹賦淹

留偃蹇連捲占地僻主人不樂喚罷酒四座賓客

言俱寂拍案高歌呼者誰舊是讀書花下客

贈鄧石如

石如懷寧人工篆刻

鄧生性有好奇癖手握鐵筆鑱山骨磨礧光怪逼

秦漢厚自期許世無匹陟山登泰岱航海越溟渤

不徒仰與學遊神在恍惚我聞昔者倉皇制六體  
鬼夜痛哭天雨血咸陽一月白帝火竟使蝌蚪奇  
文絕岫嶺雖傳大禹碑字青石赤風霜齧史籀大  
篆十五篇代興古文差爭烈摹印繆篆自莽新猶  
恐甄豐非俊物三體石經已不傳岐陽石鼓粗可  
識願君北遊觀太學魴鱖貫柳細拂拭三日坐卧  
搖心精十年工夫苦面壁應當操刀攜石重過我  
拍手大笑前言真蠡測

文孝子

名震同里  
震山鄉人

孝子知有父那復知有虎精氣與父通視虎還如

鼠

一解

孝子知有父那復知有火精氣與父通入火

不知炬

二解

孝子知有父孝子知有祖那復知有妻

與子精氣忽與衆人通得助得錢親得土

三解

孝子

不知書何以知有父精氣直與聖賢通豎儒紛紛

當首俯

四解

樂府得來當與李杲堂繡州女子詩並傳

題鐵道人畫竹

十丈素壁生秋風寒聲颯颯搖簾櫳道人畫竹似  
真竹持來掛我壁當中古來擅場吳道子潑墨却  
從窻影始洋州一派生黃州此有神通不在技銀  
鈎鐵畫誰與儔房山松雪柯丹邱道人畫竹似真



竹古意須從八法求滿堂競看雲煙繞布置森森  
絕塵表後有夏景前李衍二百年來如君少道人  
自矜筆力奇欲掃鳳尾成羽儀文章技術皆有道  
富貴窮通各有時於今世俗爭奔走得喪紛紛究  
何有寧如對竹坐晴窗日日披圖自飲酒

被偷

時館東關外庚子五月二十七日夜事也

姓名不及王彥方夜半小賊入空房青氈自是吾  
舊物棄之不屑入橐囊周環四顧別無有背負鐵  
畚走踰跟此畚向從鄰家借清晨早起幾絕糧今  
年天氣失時節三月蠶老無條桑四月連綿復大

雨大麥小麥枯不黃一門老少仰衣食束手無策  
皆徬徨良者忍饑委之命黠者失智謀不減安得  
一風復一雨五日十日恰相當高田低田皆豐稔  
上村下村盈倉箱游手反耕有職事婦子飽食多  
蓋藏諷以廉耻興以義戶外不閉家安康

敦厚之旨正  
自寄慨無窮

鳳孝子

名粹然茂  
林都人

涇川西去五十里有鳳村中有鳳生至孝本天真  
粗糲僅自給精潔供我親十年如一日服勞無晨  
昏嗟哉鳳生養非難養可能也心爲難母病不在

側忽聞鴉聲心如焚急趨歸庭問安否望眼將穿  
 正倚門母沒既營葬結廬傍母墳一椽蔽風雨土  
 墻茅屋僅容身虎從門前過搖尾不敢嗔鴉非使  
 令虎非駟嗟哉鳳生心所至下格猛獸上感飛鳥  
 况人皆有母子倫僻處一鄉隅安能四方聞慕義  
 相則效庶使風俗醇後有采風者收余此身入轡

軒

叔肖巖曰嶠  
強似韓公

送雲起五叔遊黃山

名山最喜笑客俗客不知山強駐足尋山不為看  
 山來馬駢駢兮車轆轤吾家叔氏清且奇一生別

無他嗜欲但着謝公雙木屐上下窮探山與谷每  
 逢看山山爭迎共歎此客無俗情忽憶新安好山  
 水囊被接浙無留行黃山三十六峰好峰峰都有  
 雲氣繞一日尋山客萬人山猶嫌道游客少定知  
 此游不虛遊山始愛客客絕倒披榛除棘登陡峭  
 縋幽鑿險開奧竅客為山賦搜冥腸山為客容善  
 窈窕客自佳客山佳山茲客茲山成二妙山如問  
 我不附火客且道我閉門坐他日定須來看山山  
 莫嫌遲輕怪我魯星村曰落筆甚奇尋山  
不為看山來一語道盡

雲起五叔歸自黃山示以紀遊諸作

我昔餞客黃山遊一首長歌當美酒歸來何物充  
人事兩卷新詩將出手開編如對黃山三十六峰  
圖圖所未到詩盡有巨靈鞭山山欲走走來住我  
涇川口不在東山西水邊乃在我扈班裘鍾左與  
右我雖不遊遊已到盡識三十六峰峰峰之妙  
雲氣溢出硯山間恍惚皆向十指繞誰識空靈萬  
竅通山精易竭山鬼叫吁嗟下筆如有神米山粉  
本徒爲肖固知此事不緣形迹中他日問山山應  
笑兄頰存曰于衆想所不到處別開  
與突頓令讀者耳目煥然一新

代題張某池上小照圖依白香山  
池上篇布置

近城曾築一小園鑿池置石精且妍樹木叢雜花  
果連衆綠相延以名軒園中有小屋三  
間名延綠軒白傳不作  
誰有緣題咏雖夥無當傳欲作一圖留人間名公  
巨人相披宣不謂先生得我先先生好吟池上篇  
把酒一笑天地寬置身其中何翩翩池中綠波清  
且漣池上荷葉碧田田鶴飛魚躍皆叅禪傍池小  
亭滕可安左置圖書右管絃茶爐酒鼎活火煎修  
竹引風來吾前妻孥一室樂陶然如此豈作凡人  
看雞乎犬乎吾欲仙會當拔宅飛上天玉皇香案  
掌文官謫居猶住蓬萊邊芙蓉城主何足言叔肖  
巖曰

清逸之致  
極似東坡

楊墨莊索贈詩

爲涇  
訓導

西王母使凌秋空  
鴟梟擊墜塵埃中  
拾來置之巾箱裏  
黃花喂飼羽毛豐  
瞥然一舉搏清風  
啣環夜拜黃衣童  
使君世世爲三公  
玉環潔白誰與比  
君家子孫當如此  
一時挺出大儒宗  
關西夫子楊伯起  
墨莊先生其後賢  
家傳清白承先旨  
太元萬言造微妙  
春秋三傳究終始  
諸公袞袞登臺省  
廣文一席來涇水  
四知敢受故人憐  
三惑不撓吾自矢  
懸帳分班譚馬經  
下帷列坐傳董子  
我來問字先生門  
悠然坐我春風温  
固知披拂多光鐸  
亦見陶冶出精純  
學優德劭有如此  
豈有懷寶終委淪  
他日講堂有冠雀  
口銜三鱣爲休徵  
蛇鱣旣爲卿士服  
數三應法三台登  
吁嗟先生自此升

魯星村寄書言舊歲黃山之遊得詩二百餘  
首將以寄我而未果作此復之

星村先生拔山手作詩  
鑄山字如斗書來告我黃  
嶽遊一月得詩二百首  
又言殺青苦不便不然同  
書寄左右去年我叔黃山歸  
黃山雲隨征衣飛長歌短歌  
幾累百臨風咳唾生珠璣  
先生較之又過

半探驪得鹿當爲誰  
黃山一歲迎二客  
客來山喜點頭石  
名下無虛士有真山  
靈豈敢輕指摘  
山當倩我作主人  
惟山有木工則擇小  
阮不減大阮狂  
亂將筆參墨丹黃  
便欲買舟來訪戴  
可憐春水阻且長  
徒令夢魂挾風雨  
飛越盛唐之山房  
先生落筆驅山走  
疊山摺嶺藏袖口  
何不放來渡涇水  
使我坐卧勤仰止  
左挹浮邱袂右拍  
洪崖肩李豪杜則  
細甜蜜無中邊先  
生寄我勿復慳我  
且折簡去報山

答盛春谷見訪

錢塘才子江南客  
碧眼炯炯髯如戟  
瘦馬方踏龍山雲  
寶玦尙帶吳雲白  
竭來訪我不辭遠  
萬折千迴路盤轉  
征衫未拂道上塵  
古寺共啜夜中飯  
爲言千里長相思  
三月別如無盡時  
入山好踐春前約  
半途猶恨見面遲  
感君意氣繫君馬  
欲通殷勤言反寡  
舉頭忽見山中人  
來看新客環籬下

雲童子歌

爲盛春谷作

雲童子秀而聰  
前身本是蓬萊采  
藥之仙童何年  
攢破玉虛碗  
一笑瞥下塵埃中  
蘭刈空谷草牛騎  
古道風零丁雪中  
鶴哀吟月下鴻  
忍饑不飽寒不

避破衣行歌如轉蓬忽遇謫仙子瑤池舊相逢慨  
 然念前事眼垂雙青瞳濯之上池水爨以焦尾桐  
 薰之香蘭麝潔以粉芙蓉食之胡麻衣之錦教隨  
 馬後背詩筒翩然披髮結瑤珮兩眉橫翠雙頰紅  
 吳雲楚雨上下共曉風殘月左右同欲吟先檢韻  
 箋拂霞最濃欲書先磨墨池起雲若封對之俊語  
 紛百出脫稿詩意能先通出言便便解人頤作字  
 咄咄常書空眼前進退中規矩背後學作主人翁  
 雲童子爾年幼而冲狡獪母乃驚天公豈能留爾  
 久在世似應早返蕊珠宮他日玉皇忽念長庚老  
 召取直上天九重雲童子爾須身騎白玉驄琳宇  
 紫府相追從兄頽存曰命意狡獪而出之飄忽俊  
 逸如有雲氣繞其筆端此童子何幸

大水

四月夏日日正長山中陰陰猶春涼山河如溝狹  
 可量一夜大雨驚汪洋披裘晨出山門望千巖萬  
 壑流湯湯隔岸人家水中央轟然傾倒新築墻兒  
 童搬運情倉皇木橋架水脚不強搖動忽見走且  
 僵行人欲渡愁無梁須臾上流物郎當何處漂沒  
 靠山莊榭櫃卓椅盆桶床大木老樹如旗槍頭上

腦下相低昂出沒隱現去飛揚今年蠶壞樹挂桑  
大麥方收小麥黃新秧初插小針芒何當一水漂  
猖狂是用作歌心憂傷

鷺峰寺相傳是江總持舊宅

一天花雨溪光白軼事心悲懷古客江令還家歎  
白頭朱門捨作梵王宅當日繁華轉眼過臨春結  
綺三宮闕玉樹朝朝花屑瓊清輝夜夜月如璧寧  
省床前告急封祇知天塹分南北美人狎客宴從  
容賀弼韓擒兵突入果然盛草變爲灰妖鳥哀呼  
湖水赤三十六封書未忘夢到雞臺心惻惻破壞  
家國事等閒何況區區草市迹林殘徑廢亦尋常  
見柳看桐猶太息張孔陳袁黃土塵故里行歌非  
昔日一旦深省當晨鐘此敗豈非詩酒力

青溪小姑祠

小姑自沉青溪濱一門貞義俱爲神玉肌不欲污  
塵土金簪那肯贈世人齊諧荒唐漫云續記載穢  
事神之辱我來肅拜青溪祠不唱青溪小姑曲

巖曰小詩  
大有關係

肖叔

汪醒弁以所畫小冊見贈賦此爲謝

汪君疑是畫中仙神妙直到秋毫巔贈我小冊十

二幅一一元氣函山川昔聞沈啟南作畫不盈尺  
千巖萬壑開奧竅十日一水五日石四旬以後忽  
縱橫一日百幅圖俱成濡染大筆人震驚他日更  
願請君扛此如椽筆一掃生綃十丈淋漓翠欲滴  
挂我草堂之素壁

梅石居以史晨碑舊榻見贈賦謝石居名鏐  
宣州人籍

江寧

建寧二年魯相史請出酒脯祀夫子援引讖緯語  
不經漢儒之陋宋儒耻漢家中與兆貨泉南陽真  
人起白水大頌圖讖示天下郊祀明堂義準此非

之幾殺鄭少贛而况人臣請進止六一作跋論似  
苛責賢想託春秋旨是時尊聖道未光建議卓卓  
殊可喜巍巍漢制尊而崇此碑亦足見終始梅君  
寶藏有舊榻慨贈不吝忘余鄙上距歐公七百年  
首尾完好猶全紙君家多蓄古碑銘著書應傳秦  
漢髓愚者一得或不遺他日附書金石紀

讀天發神讖碑聯文

碑石三段在上元江寧學宮尊經閣下宣  
州梅石居既綴三段連貫其辭懼有謬誤  
復與懷寧鄧石如要余同往摩娑其下攷



訂偏傍點畫然後歆其釋文與石如各爲  
跋以附于後余惟先生愛古好博有功金  
石乃就所綴讀之竊謂上天帝言以下天  
發神讖以上必當時符瑞之言卽碑所謂  
得五十七字者其字數不合以當時本有  
空白跳行之書今更殘闕不可知耳至天  
璽元年七月己酉朔以下則諸臣攷訂讖  
文刻石頌功之事也今依梅氏所釋裝界  
之而書其後

石居先生性嗜古攷正金石辨魯虎神碑三段若  
倒置連綴文辭貫如組誰歟叅者鄧懷寧思索偏  
傍入杳冥慨然作文記梗概跋後得附鄙人名憶  
昔東吳天璽日孫皓好佞符瑞出臨平厯陽石成  
文陽羨山中有石室此碑所記母乃同託言神讖  
頌吳功詔書屢遣使者視五十七字光熊熊上天  
宣命當四世昭告太平垂文字大吳一統億萬年  
褒贊靈德傳神意刊銘就石答休祥木柿南流水  
一方可憐鐵鎖沉江底終看青蓋入洛陽舉家都  
作西遷客迴視纔經五歲隔始知天命自有歸不  
在區區一佞石嗟此碑近二千年挑燈細讀心茫

然摩娑舊物亦可惜敢云過眼如雲煙

潘蘭如曰古音琅琅

極頓挫抑揚之妙

附和作

梅鏐

斗室恍惚倚依摩崖碑中出劔子戈矛森目惕  
風雨慘澹走蛟龍攫而網之援以蓉顧左盼右  
口期期字從文從得一日既召其魂問其魄尊  
經閣上三人質排列儼如周石鼓九除其六十  
去七兩段如砧平有截圓頂當中岐髮髻當其  
輦致幾轉車丈六全身思仡仡三十指隨六目  
視撫摩疴癢悲痛疾愛憎評隲爾何與剥膚刻  
髓和人計君不見祝融峰上幾人至茫茫空歎  
神蹤蟄又不見堊火已焚李斯篆惆悵榛蕪想  
收拾吁嗟此碑禮門義路相出入徒看博士弟  
子先生揖三段既合符臨摹稱具體鄧子執筆  
名姓記癸卯新秋越乙巳淋漓大篇有美琴士  
愧我爲詠赤烏皇象都官之孫子

琴士詩鈔 卷六

涇縣趙紹祖著

孫同璋曾孫

鵬飛蛟起 同校

楊聿修以漢校官碑及顏魯公送劉太冲序

見贈謝以詩 聿修名崇德溧水人

金陵客邸遇楊君相逢一揖便相親贈我漢碑及  
顏序古色編爛可照人我聞校官碑自宋出溧水  
江南古碑最難得惟有後漢光和吳天璽前日身  
到尊經閣兀立三石細摸索宣州梅君讀貫之我  
爲作歌記約畧猶憶此碑未得觀篋中難獲二美

全一旦寶氣繞君袖出手却立仍驚看體勢嚴謹  
復橫絕筆法高古不可攀蔡邕着意追程邈碑中  
用筆相後先得一已足豪況有魯公刻昔閱戲鴻  
堂精彩倍煥發此碑雖翻本不讓香光臨踈宕得  
古勁如見平原心太冲兄弟世儒雅溧陽潘乾胡  
爲者竟因一石知姓名吏治才聲炳區夏人傳不  
傳有天幸神物騰光非虛假我今何意獲此雙球  
琳珍重愛惜一日不暫捨摩娑何啻親見碑感君  
愛君中心寫他日倘過溧水須主君三日坐卧碑  
之下兄穎存曰筆力道勁通首無一懈語

題畫

魯齋不知何許人圖繪寶鑑無聲詩史畫  
徵錄皆失載余市得一小冊於宣州市肆  
中凡十頁其筆墨雅不類世俗人也憐其  
名之就湮擇其中尤佳者爲之賦得三章

水仙

珊珊仙骨來何許素衣六銖悄無語古銅寶洗棊  
木几雪魄冰魂恰相與畫師繪貌能繪神凌波步  
襪無纖塵游漢湘妃兼女英渡江桃葉與桃根緗  
縑半幅風前試礬弟梅兄各有致不須瓊島飲仙

漿祇此翩然足心醉

摹唐韓幹三駿

有唐畫馬誰足豪弟子韓幹先生曹魯君何人拈  
秃筆朔風岔出霜天高兩馬矯首一馬顧邊草枯  
黃思健步散漫閒暇意自如蹴踏超騰氣未露追  
風躡電雲作花案圖令我生咨嗟安得騏驎來地  
上不教泥首困鹽車

蜘蛛結網圖

畫師巧與蜘蛛同抽絲如髮筆如龍游絲四掛網  
正中空明一片疑無踪落葉飛蟲墮無數飄搖不  
定網公怒曳繩役智縛黍民耽耽自謂莫余忤黃  
蜂傍草依復起翩翩去網不盈咫縱饒螫尾足相  
當慎勿將身投網裏

雲起五叔餽何首烏食之無他而時聞肖巖  
四叔以服此致病翌日得五叔書又自云  
得洩瀉疾首烏恐非真之故因作此答之  
兼呈四叔

我聞良醫醫人相醫國五方異宜亦如五聲與五  
色寒熱虛實各不同欲作一例看不得我生瘦弱  
脾腎虛終年煮藥不獲參耆力巧坑環山山有靈

交藤半夜風撼撼童呼叟歎欲潛逃長鑱劓倒山  
半壁圓若栲栳長若臂亦有鶴立鵠形神奕奕緘  
題封裏不使外人知嘉惠分來寶拱壁桑松手自  
燒鼎鑄手自滌無根挽取長河水三碗煎來自飽  
喫添精填髓望甚奢無益無損渾如昔固知天生  
形氣當在自扶持區區乞靈藥餌祇似水投石昨  
者忽有聞疾卧南郊客四叔時寓南郊古香齋頗悔未達嘗  
幾為醫所厄今者巧坑書告以疾且劇翻腸似輓  
轡前物當棄擲爾雅蟲魚讀未精螃蟹彭蜺竟不  
識疎虞莫漫笑前人輕脫還當痛自責我謂物一

人不齊宜之則順否則逆偶然一誤旋復初此小  
事耳何足惜古來醫國如醫人噓枯吹生祇片刻  
我駑僅堪學養生二叔雄才當捧檄小者一邑大  
一方為藩為令各率職須知輒以輕重安以無事  
祇眡風土與性情莫似今朝誤服食盛春谷曰余嘗問琴士詩  
學何家答曰涉獵耳無所學也如此等詩博大多  
雄深而不能確指其為唐為宋琴士故不欺余

過磨箭嶺在涇縣東九十里

亂山奔赴勢欲吞兀然壁立開一門門前大石豎  
嶙峋高低羅列如兕孫石上刻畫何班班昆刀切  
玉入無垠長不過寸深一分土人張皇語旅人天

清氣爽或不聞山鬼夜戰雨與風陰崖銃發金鼓  
填天明留此磨箭痕父祖居此五百年日日來視  
痕若新我笑不應默不然囊中取墨磨一團同行  
助我競紛紛或以土拭或以塵須臾却看黑已勻  
方圓盈丈堆烏雲棄去不顧更不言東趨戰嶺山名  
在磨箭嶺東宿山間山中之人爭餽餐問來可見  
磨箭山漫然應答意不關飯罷洗足上牀眠一夜  
雷雨金鼓喧詰朝晴霽取路還亟思審諦破俗謾  
黑中露白光復眩千條萬條細若攢一時驚怪噴  
有煩我聞郿縣河上灘灘石中有天然鱗又聞平

陽土媮爛手跡如掌或如拳大同山石人骨齧造  
物變幻難具論世間異事千萬端世人少見休相  
調作詩紀事不肯刪留待好事人爭傳盛春谷曰  
此亦有韻  
之文也

汪麗初貽墨

名珍績  
溪人

十年不見黃山客每依白雲望秋月朝來寄我雙  
鯉魚副以瑤函貯龍骨黃山百尺虬松枝陰崖夜  
走鹿與麋燒煙煮角合冰麝不愧墨官古李奚我  
生事事迫碌碌野鶩家雞隨意逐折釵屋漏漫沉  
吟議論空多力不足手把一鋌雙眼明黑雲驟起

壓管城且將領畧故人意時時小啜空復情

偉堂學舍新葺種竹栽花之圃

東風搖曳寒江浦叢竹野花連山塢先生學舍窄  
如舟拓地編籬成小圃圃前架屋兩三間索綯都  
取白雲菅環籬繞屋何所有植花百本竹千竿千  
竿森森碧如玉名芳異卉含新綠日取長江四石  
水赤脚園丁勤灌沃去年不雨田無梁今春不雨  
麥又黃一花一竹可日漑安得沛澤及四方爲雲  
爲雨降甘澍千里歡聲騰道路却教同樂先生園  
新篁敷翠花嫣然

叔肖巖曰後半忽縱忽收極神光離合之妙

同黃梅喻石農嘉定朱梅圃暨兄偉堂登北

固山放歌

石農名兆鼇梅圃名綿生

天目銅坑走不住別嶺入江開北固上有千尺之  
高亭飄渺凌空帶烟霧微風舉腋挾客登金焦兩  
髻入指顧濛濛遠樹隱揚州葉葉飛帆下瓜步長  
江一碧無纖埃落日照耀金鱗開須臾怒濤奔萬  
馬白雪浪捲蒼天來江豚露脊鼉鼉立馮夷擊鼓  
羣龍迴水聲風聲互憂吐鏗訇砰湃如殷雷江山  
如此信竒妙獨遊幸免昔人笑子由筆力遜髯蘇  
空負才名誇二到喻君朱君天下士誰闢山靈鑿



奧竅詩腸恰放鐵甕寬棘手更掣金鼇釣請君踢  
倒黃鶴樓更與掀翻鸚鵡洲吳宮花草助顏色練  
江風物恣雕搜浩歌一曲滿天地楚水吳雲凝不  
流叱變春江三萬斛翩然轟醉無時休

謁陸丞相祠

黃鵠山頭東風起一時吹綠京江水蒼茫遠接崖  
山濤浩氣騎鯨來萬里水荇爲佩荷爲衣參馮夷  
兮從龍螭荒祠古道掩深屋寒風白日翻靈旗到  
來客子酬杯酒枯藤滿壁蠨蛸走惆悵君臣葬海  
沙大星當日落如斗噫嘻戲福州礪州眞苦辛文  
山血濺乾淨土張公亦作波濤臣宜中鼠輩何足  
云三賢志節峙山春

與汪湘芷奕

能風鑑  
知醫道

南山斧柯石爛死平鋪水雲吹不起人間何事到  
神仙荒村夜半姑語婦丈夫苦無封侯骨三十男  
兒困蓬累世情冷煖玉碁子虎領燕頸竟奚似知  
白守黑聊爾爾君能洞見垣一方遊絲八極心曷  
底

鳳圖石歌

潤州學舍向有四靈圖宋摹漢刻者也府

志龜龍久廢惟麟鳳存詢之士人無能知其事者偶於日精山下見碑首劖而視之似鳳字形遂使掘深七尺而見之果鳳圖也喜而賦此

山陽漢有四靈圖潤州學舍乾道摹我來訪古稽郡乘龜龍久已沉榛蕪惟有麟鳳二片石淵源堂中峙廡側詢之居人多不知堂傾址廢寒烟白世上何人能好古日精山下空愁憮墻根瞥見螭首歆頂纏枯藤跌入土劖草及泉頻揩洗鳳字隱隱鳳欲起九苞瑞彩不空翥土花蝕翼苔點尾贊竒

字古勢掀騰和平寬博非凍蠅旣掘大鋏引長繩精怪煥發光燭庭我聞威鳳鳴有道丹山萬里梧桐老定知此圖出應時神物豈終委荒草安得解人常護惜覆以廣厦嵌之壁麟兮有日耀祥光學舍依然完雙壁

附和作

兄偉堂

乾道壬辰潤學宮摹漢麟鳳圖者熊

宋教官熊克所摹

厥後嘉定歲乙巳四靈立石廡西東代遠年湮歷兵燹縱據郡志搜尋窮阿弟好古勇過我往往解橐傾青銅古物應時有竒怪偶爾得之蒿

萊中日精山即高岡是百株松樹成梧桐碑上  
半截鳳完體振羽欲起儀蒼穹下隸書贊及旁  
注土花齧護煩神功阿弟長歌紀巔末頗矜賞  
識無人同尚有麟兮在何許非如久廢之龜龍  
淵源堂傾才逾紀長鑿掘徧無遺蹤且令百夫  
輦致署樹之堂左猶紗籠還堪慰藉礮石待傳  
有拓本藏巨公時聞袁簡齋先生  
有家藏麟圖拓本願乞錢勒成  
雙璧我懷豈減先儒風

焦山僧贈周鼎銘

老僧袖中一卷雲流出袖口片片輕墨花璀璨光

燭庭知是焦山周鼎銘籀文奇古繼蒼頡十有八

九為象形右佑有別豈可混立位異讀皆足徵無

專世惠空聚訟此亦何必煩紛爭內門二字得真

據翁公潭溪神識吾所膺甲戌丙子但紀日其年不

紀難為憑南仲出車著詩什要是宣王當中興後

生末學敢自詡寶秘但欲逾縑繪勢看飛揚起旌

旆氣鼓精銳走雷霆宣和博古失記載岐陽石鼓

均愛憎才簿奚堪賦爾鼎強把鼠尾書溪藤歌成

北風吹雨雪長江三月積素凝周鴻軒曰書味在  
胸吐屬自爾淵雅

不必矜奇炫  
異斯稱肖題

隨堤

小住蕪城春暮天隨堤新漲恰放船夾岸桃花紅  
作雨沿溪楊柳綠如烟迷樓九曲渺何處湖上遊  
人自來去任泊東風幾橋無人一弔雷塘墓

康山

北地見殺不愧直臣對山不救不愧友生如何武  
功從井殉人今日何好風吹得狀元到狀元能使  
老公笑老公笑走兩璫錦衣獄出夢陽狀元坐落  
籍何年滯維揚康山上琵琶聲對山去康山名康  
山之名名不絕對山之名名幾裂兄穎存曰以從  
井救人責武功

自是正論但李前既畏死而求救後則負恩而隙  
末是以人欲薄李而恕康耳胡曲阿曰康山以  
對山得名見對山自有可傳處詩以議論  
夾寫不同苛論其聲調則全似古樂府

謁史閣部墓

梅花嶺上多白雲梅花嶺下埋忠魂我來雲冷梅  
花落春風下拜古墓門墓內忠臣心似鐵墓前勁  
草空蕭瑟辛苦南都事業非擁戴垂心出倉卒倉  
卒圖成莫共覆督師自請來維揚但期一死了臣  
節從茲不復叅廟廊廟廊有相稱元老司馬新編  
詞更好江南已愧小朝廷至尊猶恨梨園少梨園  
絃管奏清宵枯魚遊釜燕幕巢邊愁忽起武昌柳

跋扈將軍縱士驕驕兵傳檄清君側四鎮移師出  
采石

大軍進搗震雷霆淮海望風俱解甲人心去矣收  
拾難孤臣黽勉當時艱三千死士感忠義泣血登  
埤扞彈丸風雲慘淡兵戈色填海雄心長太息平  
生心事一卒知相公此卧不易得圍城分撥寄家  
書從容就義寧非夫大荒走訴高陵下披髮號呼  
臣罪無

聖主隆恩天浩蕩

賜諡贈官臣節獎衣冠葬處壘高墳祠堂石壁刊

遺像

宸章四韻慰孤忠信史流傳貽不窮何須異詫當

時夢

相傳公生時太夫人夢文山來

千古文山志節同

袁簡齋太史曰

詩極自然足覘氣度

畫馬

畫無名氏二人二馬梅石居愛其神駿如  
生馬也余故爲賦之

秀鐵呵倒龍眠筆阿誰寫真留駿骨梅公不減支  
公豪開圖失縑馬騰出座中無言白日靜壁上颯  
颯風沙急奚官狎馬如狎人意氣閒暇馬相匹卽

今駿馬世尙多伯樂已死誰一過着手向爾重摩娑一杯相屬吾當歌驂騑老矣將奈何

袁簡齋太史曰詩近

杜陵序尤簡勁可愛

### 書平淮西碑殘字後

神龍無首無尾天際垂露出一鱗片甲半爪何陸離眼中突兀忽見韓公平淮碑百二十六字留端倪金陵王氣沉沙泥寶光騰上燭秦淮當年不傳誰氏書高騫鷹隼盤虬螭疑裴疑柳難是非費却青蚨三百五十有五竒零星收拾買之歸淮西功成惟君謨惟相一心功所推承命作文公不辭鋪

張揚厲臣所宜典誥雅頌合而爲拜手稽首特奏鈞天辭李愬竒功冠一時翻因仆碑末減之文昌羞耻渾不知蛙鼓蚓笛歌且吹歲歷九百餘載到於茲段碑荒草埋趺龜豈知神物與公相扶持兩紙忽出爲吾齋沙石磨礮乃有拓本遺錦裝匣貯封且題竒朋好事競求窺開函未發先騰輝晨星落落蒼天低

兄頽存曰突然而起精光閃爍莫可端倪案之字字着題自然合拍洵屬

竒筆通體警健亦復相稱

### 書中興頌磨崖碑後

中興之頌何煌煌漫叟吐辭叶宮商銀鈎鐵畫大

於斗如見平原鬚髯張當年鞞鼓驚霓裳崎嶇劍閣何倉皇父老苦留太子住未厭土德天祚唐靈武卽位事有權應天順人帝所減花門勢面懷聖德羣臣諸將爭趨蹕稟命不威專不孝此舉誠乃固苞桑兩京收復殄羣逆恭迎乘輿迴瞿塘躬先導馬天子貴上皇色喜神洋洋外間嬖臣內間婦不終孝道殊不綱微高將軍兵死鬼西內寂寞生悲涼事出兩截要分論未可一例肆謗傷涪翁作詩本史說但有譏刺無褒揚趨取大物罪以篡揆之情事似不當墨花璀璨懸中堂金題玉裏雲錦

裝滿堂動色歎神妙使我論古心茫茫袁簡齋太史曰論事

自當如此非欲故翻涪翁詩案也叔

題邱順孫旌孝紀畧邱蕪湖

生不得事父思所以事祖吾不能事祖是再死其死父以孫代子不愧為孫以祖為父不愧為子而不得事父之心愈苦嗚呼邱君足千古袁簡齋太史曰筆力

清勁能為古文

贈邵東田東田名士鈐蕪湖人

故人屐到琴溪邊我昔載酒相追攀故人家在鳩江上我今停舟來相訪門前颯颯吹江風萬頃波

濤眼底空小隱不妨城市近畫禪欲破南北宗偶  
然忽動滄洲趣一幅生綃起煙霧來朝卷去趁風  
行泚水清江時反顧

書雲起五叔潤州游草後

潤州山水天下奇春正二月遊見之雕鑿不發山  
靈秘唾壺擊碎觀叔詩平揖米蘇絕行輩收拾梁  
宋無纖遺下披古器及碑誌磨礧駁犖生光輝長  
簡短牘揮不止纍纍流貫連珠子丁卯橋頭少詠  
謳我昔何闕叔未遊自應蠟屐不曾到非關棄擲  
同掉頭寒天風雪吹颼颼爛銀鋪海玉作樓光芒  
百丈夜不收活火煎水傾磁甌叔歌我和發清嘯  
玉碎冰開花欲笑奇書滿架酒滿壺縱橫脫帽亦  
自如祇此樂事足千古豈有富貴到寒儒昨日簷  
前喜鵲噪潤州廣文遠寄書行年六十不服老公  
車猶上長安道

爲崔雪堂題張簪山蜜崖圖

雪堂名繡  
太平縣人

崔侯之祖南極翁心精貫石山爲通不須五丁拔  
蛇尾焦原側足平如砥誰與圖者張簪山烟霞繚  
繞山之間奇景忽落幽人手翁名常掛行人口作  
歌誦德德必昌後人繼武前有光崔侯崔侯慎勿



忘置身當在青雲上

蜜崖當寧歛之衝地勢險阻行人危焉雪堂之祖南極翁

鑿而通之

### 僧西印以桑木盆見贈

眼光射破千年紙天教奇疾困壯士金篦不刮翳  
膜清腦脂幾遮張籍死風輪飄忽起旌旆蛟蜃頃  
刻浮海市窈窕游絲上高樹猙獰長虺拖巨尾適  
從何來怪集蠅萬木飄零驚結藥汪汪大波推若  
山纍纍貫珠墮如李蝦蟇蝕月狗吞日千奇百怪  
難屈指自非識膽學力兼不然疑崇還疑鬼枯桑  
中林鳴天風上應瑤星百年紀傳聞功力過決明  
遠邁參苓高菊杞老僧六十如童兒碧眼炯炯照  
窻几前身應是龍木師斲木爲盆持送似三年幽  
憂摧心胸况復奔波不曾止躑躅常遭按劍嗤服  
食難云勿藥喜神雷不爲起空青年復年兮伊何  
底感師厚意過瓊瑤欲借龍泉日貯洗倘見碧海  
磨青銅重使瞳人剪秋水明珠青玉報未能聊作  
長歌寫余鄙

### 丁未借榻玉露庵到館有作

下坊渡口喚渡船十人趕渡五不前呼聲啞啞船  
莫發人多載重船遷延船者顧我了不識道我生

客索一錢下船登岸沿嶺上兩山夾路路蜿蜒道  
傍枸杞十圍大茶亭穿路當山巔山勢到此勢一  
束玉露庵結山西偏山僧出迎笑舊客怪我不  
到何十年風塵奔走尙故我面目慚愧羞答言入  
門堂構煥華彩莊嚴古佛金新鮮茅茨破柱想疇  
昔一變壯麗誇精專山僧自愛修整力讚之得意  
語糾纏黃昏風雨復大至百感中來且灑然鋪牀  
拂席夜中飯洗足吹燈一覺眠袁簡齋太史曰  
極似蘇長公

春日寄見明玉輝二禪師

巖關天險輕鴻毛螳臂欲攬車輪高我思其事心  
爲勞太平百年鬼燐盡梅花笑發香蘭天却憶二  
師住古剎楞嚴讀罷讀離騷

梨花

昨日不踏寺前門梨花燦爛舒玉英翻疑積雪壓  
千樹不覺寒從脚底生去年看花揚州好虹橋兩  
岸聞流鶯天教素女翻雲車一夜淒風紅白并泥  
塗零落豈足道游興詩情殊草草固知寸步生窒  
礙不如歸卧田園好今年蕭條野寺春地僻難云  
發興新水西咫尺不能到桃花李花愁殺人冰姿  
素魄留開眼風期暗與幽人親卽今飽看意已足

更待夜月添精神

連雨水濁內人以所藏冬雪煎茶喜而賦詩  
涇川直下三百里不必茶經品泉水何當急雨灑  
空山雪沫雲濤收不起草茶無旗但有槍龍團日  
注相低昂三日無能漱齒舌一半祇得入鹽姜山  
妻屏疊理鼎鑪笑指一甕爲余藏探瓢雲氣忽騰  
上玉龍脫骨流寒光曲几蒲團坐未穩跳珠戛玉  
聞沸湯入碗細看鴨頭綠到口忽作春風香何須  
斗酒供醕酊落花滿窻長日靜此樂不許渴羌知  
且自彈琴對鬢影

袁簡齊太史曰清  
適秀雅風調宜人

書魏勸進碑後

代漢者誰有當塗手盜神器負以趨老奸巨猾不  
敢取使爾小醜蒙名乎堯禪舜兮舜禪禹亦有謙  
讓非獨孤鷹耶犬耶無耻徒歆詡朗若輔果繇頓  
首頓首陳瑞符拜獻欲比臯益謨天命有在弗久  
須大書深刻臨通衢下誣千載上唐虞書生論事  
非論書拓本古妙能驚吾文殘字闕墨模糊鍾繇  
梁鵠皆非夫一字猶得直一珠風骨在手身却無  
書魏受禪表後

嗚呼螟蝗生蝮蚰許昌氣見當塗高奉璽賚綬冊

天子昔見舜禹今有此曩屭峩峩蹲穹碑上誣神  
聖鑱雄辭豈識故事大堪師三馬同槽知不知封  
狼生羆羆生羆

奉和族兄偉堂重刊麟圖石歌

秋雨淒其秋風勁文場戰北氣空橫潤州學舍遠  
寄書開函使我雙目瞪瞥見麒麟壁上騰四足破  
空勢交迸古隸崛強銀作鈎墨花璀璨光如鏡更  
看蠅頭楷尤妙細讀新詩句愈硬自嗟自慰異怨  
尤閑以聖賢正情性古來祥異本難憑世事纖微  
皆有命冷官不達兄何憂一第無成吾未病初丙午十

月潤州學圃產芝兄以為瑞繪圖賦詩丁未禮闈  
報罷自京歸潤歎其無應故原唱及之而余答其  
意也要當各盡所得為寧使沒身事則定盛衰意氣  
奚足云平其不平是曰平披圖對歌三反覆此事  
直與古人競洪北江太史曰硬語  
排空極似韓退之

附原唱

兄偉堂

古人務實不務名功濟蒼生第一義不然經術  
亦真傳興修廢墜又其次余昔自命頗不凡釋  
褐仍著舊儒衫六載自書下下考縱餐苜蓿終  
懷慙昨年瑞芝產學圃了無效應吾何憚典守  
之責未敢辭繚垣頻欲輒易土邇來對花鳳石

齋吟餘無事縈心懷且將麟圖補刊石搗數千  
紙貽朋儕

屢欲往小幕山不果以詩寄其僧

幕山山臨大道邊一月數到常隨緣小幕山接幕  
山麓路少迂曲脚不前我家距山祇五里於今不  
到十七年今年借榻幕山院便欲往探山之巔我  
踈山山亦踈我故使風風雨雨連爾來新晴四五  
日桃紅柳綠更嫣然清明士女戲佳節紅粧照耀  
山新鮮頭顱四十豈不耻而欲雜逐爭春妍幾番  
出門着遊屐依舊縮退還安眠寄語山僧勿遲我

爲我謝山山應憐

題四朝畫冊爲梅石居作

烟雲突兀變眼底一片寒光吹不起世間至寶落  
何人梅君招我爲開此賣田買畫亦大難豐年號  
饑寧一餐知君鑒別負竒識愛此尤物不易得遠  
者王右丞清和婉轉藏觚稜近者宋子克瘦削峻  
嶒撐石骨中間歷歷羅宋元一一元氣函山川筆  
精墨妙本無價可惜祇費三百千手亦不敢指口  
亦不敢言但願至寶君莫傳傳非其人恐飛騫當  
如老龍抱珠卧九淵縱有探手慎勿眠

錢叔寶為柯丹邱補竹圖

丙午之歲余在白門梅石居借來友人錢  
穀畫竹上有危素題蓋題柯九思竹也其  
下錢自記柯竹已亡惟危題在以及已補  
作之意竹字極古雅可愛已酉復訪之石  
居已不知歸於何有矣寤寐憶之故作此

詩

奎章妙繪化作龍太常寶翰垂長虹阿誰痛惜神  
物去劃然十指生秋風枝柯交屈漏痕古虬螭盤  
結精氣通丹邱前身應老可懸罄之客將毋同三  
載仍來問舊迹太息春雷又破壁猶將約畧粉虛  
空黃昏月落雲雨黑

過七聖廟

廟之右為古香齋先  
伯祖星閣公所題也

寒雲慘淡愁日暮古廟荒荒隴頭路隴頭回首望

行人客子低徊暫駐步庭前老桂吹古香樹在庭

空人非故欬笑如聞棟宇深手澤猶將鬼神護文

爭詩鬪不一瞬雨散雲流寧可住老成凋謝墓草

枯晉公于新知落拓儒冠誤俯仰嘆息還出門千百

寒鴉噪庭樹山門已闔山鬼啼但有山月隱薄霧

寧國總戎楊竹廬索畫竹報之并題寄

將軍骨相飛食肉苦耽筆墨不隨俗傳聞丹青到  
古人前者董源後石谷琴士也是好健兒上馬能  
歌出塞曲惜哉功名與世違日抱琅玕媚幽獨空  
山卧雪聞打門忽得遺書索畫竹相許寧論迹與  
形揀得剡溪藤數幅鼻涕垂冰口有霜嫋嫋清風  
十指出驚雷起螫不及春何得龍蛇忽競逐題詩  
封寄掛君軒坐客滿堂皆屬目嚴飈凍掣轅門旗  
寒光厯亂相披拂將軍善畫蓋有神掀髯應笑鐵  
交屈恨我不識韓荆州早邀品題誇楚玉恨君不  
識顏真卿空看力量劖墨骨他日相逢可不言江  
城一笑春風綠

記夢

故人遠在龍江口兄弟愛畫古未有昨持一卷贈  
殷勤依稀記得題胡君君家畫是玉抵鵲檀軸縹  
緗滿芸閣後者石谷前關仝元氣淋漓翰墨中此  
何足數煩君賜不能開卷心含恚君言勿恚看瀟  
湘袖口更探古錦囊疑是梅花盒裏客瞥然蘭蕙  
歌絹白前有題識書龔新不知今世當誰人我云  
此畫未爲好拍手狂言君笑倒出門倏閃去不還  
追君飛越度關山山日杲杲鳥關關已知身落禪

房間

自幕山往遊小幕山

小幕山勢鬱嵯峨一峰突兀橫臨河我留幕山已  
兩月心慙不到如老坡三月五日天氣和采蘭人  
散上已過偶然游興生脚底翩翩欲往山之阿上  
踏片石攀蔦蘿下聽曲水奏絃歌梵宮在望不咫尺  
紆迴數里猶差訛忽登絕頂豁兩眼如服靈藥  
消沈疴垣頽壁破非疇昔駘皮古佛金消磨山僧  
鶴骨出迎客仰觀古寺嗟誰何僧言怪龍掀屋角  
黑風一霎遮修羅二十年來不轉瞬盛衰如此理

則那大觀亭子山之左新加整理平不頗推窻倏  
然風滿戶下有修竹當陂陀一茶初罷揖僧去新  
詩火急行自哦香爐峰邊立頃刻不覺落日翻金  
波

香爐峰

我聞廬山香爐峰銀河百丈飛虛空潯陽泊舟望  
絕巘天然秀出青芙蓉廬山勝景邀佳客前有謝  
公後太白此胡爲者上凌霞森森竹樹撐槎枒金  
匙玉鎖三百里但見涇川之水羞若耶阿誰錫名  
名未播琴士題詩詩莫和君不見魯山溫泉比驪



山可憐同是陳驚座

巧坑怪石歌和五叔雲起作卽次元韻

巧山巧石當軒南突兀半壁壓山潭雕鐫何者肖  
造物有客舊住台之巖古洞封雲鞭未起虬鬣偶  
蟄姑來潛同遊好侶得幾許祇有布衲僧二三前  
書招我不盈尺雙鯉躍出爲開緘巧山石巧時未  
巧使我東望慚此峭壁與名藍想當清風明月夕  
山如美女開玉奩東坡袖中有東海米顛甘露下  
松杉高吟朗朗每一過出入石罅萬響兼近聞拓  
地得弓半恰在石左支數檐巍然便當牆半堵何  
待乘槎鍊石逞此荒唐謬悠之雄談巧山留客住  
巧坑恣客探山石媚客邀客品一一題識無洪纖  
人疑拔地鎮道院留與佛界爲莊嚴我謂天公憐  
壯士使俯不窘仰可瞻不然入世便磊砢江畏風  
波市畏鉗不如對石巢山曲塊然一璞還中含此  
中莫着俗子俗勿與輕語凡夫凡山容窈窕客可  
喜山鬼揶揄客何慙長年石上安藥鼎雪中掘獨  
資長鑱作詩自謂山主人開徑望益山之尖

程廷一筆

石上老兔望月明宣州散卓誠懸驚米顛自製右

軍樣入之醜墨世無京千年寂寞誰策勳龍門近  
有譚與程台巖老人王米手銳頭尖奴能怡情戲  
爲譚子作小序使與諸葛長齊名我謂程子技更  
精妙處不在自經營湖州女兒多娉婷不學秦女  
吹鳳笙但學秦皇封管城程也大醉卧其側投梳  
折齒心不縈忽然躍起攘到手奏刀砉然飛玉瓊  
三文雞毛擲向我龍耶虎耶活而生爲汝一笑起  
題壁漏痕落落何縱橫

含山子竊去余書數幅詩以寄之

巧坑僧也

中年得道難成家心知其意力不加側努波趯守

舊法抽刀斷水錐畫沙法華退谷呼不起尋師祇  
在古刻裏尖頭奴子張我軍到手渾如挽六鈞溪  
藤嫌沱璽嫌汚蛇盤蚓屈蟲食紋緘箱屨戶忽化  
去豈其筆意已通神輝師潛入書畫舫

含山子似名玉輝

到蛟宮大寶藏緯簫探手不自嫌數紙攜去補佛  
龕長鬚懊惱歸來告我醉胡盧成一笑俗云竊書  
不爲賊佛言五戒首偷盜而況要此更何用愛玉  
空爲燕石好台巖喜作寺壁題力量斬截誇印泥  
酒酣點筆落如雨神明不減庾安西師久問法如  
子弟何愛野鶩棄家雞

晚過玉露庵有作

我從南陵掃墓歸晚踏玉露庵邊路山僧築垣山  
門外挽我入門叫且住沙彌狂喜請喫茶老犬識  
客卧如故壁字雖無碧紗籠拂拭猶然潔且素起  
看前山千樹梨瑤華滿地何堪數眼前清景自足  
詩暝色催人難駐步揮手別僧兼別山但見山頭  
掛玉兔僕夫喃喃火急行一霎渡頭喚古渡

古松歎

老松盤踞如有神亭亭車蓋一千春惡僧悍然礪  
樵斧鐵榦霜皮委棘榛憶昔借榻清渠閣每望山  
門渡短笻炎天白雪薄巉巖靜夜寒風響萬壑悠  
悠雲散二十年時時夢到百尺巔千歲童兒坐松  
下對我歎息如有言蚪姿自分巢鸞鳳神物何堪  
翦伐送當時無故抱隱憂豈知不幸言多中上訴  
真應泣天宰自古桑田變滄海不忍重遊問舊跡  
杜陵尙有高歌在

伯甄溪有古松歌

